

ԱԶԱՏԱԲԱՂՁՈՒԹՅՈՒՆԸ ԵՎ ՈՒԺԻ ՓԻԼԻՍՈՓԱՅՈՒԹՅՈՒՆԸ Ռ. ԶԱՐԴԱՐՅԱՆԻ ԱՐՁԱԿ ԲԱՆԱՍՏԵՂՈՒԹՅՈՒՆՆԵՐՈՒՄ ՈՒ ԼԵԳԵՆԴՆԵՐՈՒՄ

Զարդարյանի արձակի թեմատիկան շատ ընդգրկում է և չի սահմանափակվում գավառական կյանքի արժարժումներով: Գրողը իր արձակ բանաստեղծություններում ու լեգենդներում փորձում է խորհրդապաշտական պատկերների և քնարական հերոսի գաղափարական ներշնչումներով նախանշել հայ ժողովրդի ազատության, փրկության ուղին:

Զարդարյանը պայքարի երգեր բաց տեքստով չէր կարող գրել ինչպես համիդյան բռնապետության, այնպես էլ երիտթուրքական կեղծ ժողովրդավարության տարիներին: Տրամաբանական է նաև, որ այդպիսի ստեղծագործություններ նա կարող էր լույս ընծայել կամ կեղծանվամբ, կամ էլ՝ գեղարվեստական մեթոդ ընտրելով սիմվոլիզմը: Փաստեմք, որ արևմտահայության համար ծանրագույն շրջանում՝ 1905 թվականին, գրողը «Էժտահար» ծածկանվամբ Կ. Պոլսի «Շիրակ» հանդեսում լույս է տեսցնում «Եկեղեցիին առյուծը» նորավեպը (թեև ծավալով վիպակ է հիշեցնում), ուր հանձին տերտերի ակնհայտ անհանդուրժողականության և ըմբոստության կոչ է անում հայությանը: «Եկեղեցիին առյուծը» գաղափարական տեսանկյունից Զարդարյանի առաջին գործը չէ, սակայն արժեքավոր է այն բանով, որ արձակագիրը դրանում բացեիքաց ի դերն է հանում բոլորի ազատասիրական նկրտումները: Քահանան, փաստորեն, Զարդարյանի գաղափարակիր հերոսն է, ով զինված դիմադրություն է կազմակերպում թուրք ելուզակների դեմ ու վճռականորեն պատրաստ է զոհվելու: «Պիտի մեռնիմք...», - առանց տատանվելու պաշարված քահանան պատասխանում է զինակիցներից մեկի հարցին: Զարդարյանը տերտերին օժտել է նաև խորաթափանցությամբ ու հնարամտությամբ՝ դրանով էլ ավելի ընդգծելով վերջինիս գաղափարական լինելը: Գրողը, սակայն, տրամաբանական շարունակություն է գտնում նորավեպի համար: Նա, ինչպես և երկի զլխավոր հերոսը խորապես գիտակցում են, որ փոքրաթիվ ուժերով ցաքուցրիվ պայքարը, թեկուզև հերոսական, բաղձալի հաջողություն չի բերի: Այդ պատճառով էլ քահանան որոշում է զենքերը վայր դնել՝ հույս ունենալով այդ կերպ գոնե փրկել կանանց ու երեխաների կյանքը: Զարդարյանի այս ստեղծագործություն-

նը իրավամբ կարելի է զուգադրել Բաֆֆու ծրագրային-քաղաքական վեպերի և Արփ. Արփիարյանի «Կարմիր ժամուց» վիպակի հետ: Ի՞նչ է հարկավոր իրականում, որ ազատասիրական կրակը բոցկլտա և հուրիրա բուրի սրտերում, որ յուրաքանչյուրը հասկանա ու գիտակցի ազատության գինը: Չարդարյանի համոզմամբ՝ դրանց հասնելու համար հստակ երկու բան է անհրաժեշտ՝ բարձր, աննկուն ոգի և ուժի գիտակցում: Այս հիմնադրույթները Չարդարյանի մոտ կարգախոսից վերածվում են մտածելակերպի, գաղափարախոսության:

Արձակ բանաստեղծություններում ու լեզբնդներում Չարդարյանը բարձրաձայնում է իր համոզմունքները, հուժկու և ազդեցիկ խոսքերով կայծեր բորբոքում մարդկանց մեջ: Ընդհանրապես Չարդարյանը հիանալի է ըմբռնել հայ ժողովրդի կորուստների ու ողբերգությունների պատճառները, վերջինիս միշտ խանգարել է տարերայնորեն գործելը և ուժի գաղափարի բացակայությունը: Գրողը, սակայն, հմտորեն խորամուխ է եղել փաստերի հորձանուտը և այնտեղից վերհանել պատճառների պատճառը. ազգը բաղկացած է անհատներից, ուստի՝ բոլորն անխտիր պետք է ազատության իդեալի նվիրյալներ լինել՝ պատրաստ գիտակցված մահվան, որպեսզի պայքարի վերջնարդյունքը հաղթական լինի: Չարդարյանի համար առասպել է մի քանի անհատների անձնագոհության գնով հաջողության հասնելը: Մի շարք արձակ քերթվածներում և լեզբնդներում կարմիր թելի նման գծագրվում են Չարդարյանի ուղենշային գաղափարները: «Նախատի՞նք անոց, որ հառաջապահ դրոշակակիրներուն վիրավոր անկունեն օգտվելով՝ գլխիկոր ծուկկի կուզան ազատության ժամփուն վրա և դյուցազներուն փառքը սակարկելով՝ իրենց ողորմելի գոյությունը ապահովել կջանան. ո՛հ, կաղաղակենք մենք մեր բուր ուժով, ո՛հ, թող չենք տար. և եթե մեր բռունցքները անգոր են ու մեր կամքերը լուծի տակ, օ՛հ, կբարձրանանք կախաղան և մահվան բարձունքեն մեր արյունոտ շղթաները իբրև երկնային վրեժխնդրություն՝ կնետենք ձեր և դուշմանին մեջտեղը, գերեվաձառության շուկան դարձյալ փառքի տաճարի փոխելով»,¹- այդպես են տրամադրված թուրքական բանտում գտնվող ըմբոստ հոգիները («Պահակները արթուն են»):

«Կայծերը» արձակ բանաստեղծության մեջ Չարդարյանի հերոսը գաղափարը կայծերի տեսքով տարածողն է, ով վստահաբար գտնում է, որ արդարության ու ծշմարտության ճանապարհը հենց դրանով է պայմանավորված. «Տեն այն շավիղը, ուրկե ես անցած եմ բզկտվելով, բայց ստեղծագործելով, ըսավ վիուկը,- պիտի առաջնորդեն քեզի ու դուն պիտի սերմանես կայծերը և պիտի հասունա կրակի ու հրդեհի հունձը: Հունձը, ա՛հ, այո՛, հունձը, որ պիտի ոռոգենք մեր արյունով՝ որպեսզի կարմիր ծաղիկները կյանքի իրա-

1 Ռուբեն Չարդարյան, Ցայգալոյս, Երևան, 1959, էջ 342: Այսուհետ այս գրքից կատարվող մեջբերումների համապատասխան էջը կնշվի տեքստում:

կանությունը արգասավորեն...» (էջ 347-348): Տեղին է նշել, որ այս ստեղծագործությունը էությանը և բովանդակությանը հիշեցնում է Բաֆֆու «Կայծեր» վեպը՝ այն տարբերությամբ, որ մեծ վիպասանի հերոսները թե՛ կայծեր են բորբոքում, և թե՛ գործնական քայլեր ձեռնարկում:

Արձանագրեմք, որ «կրակ», «խարույկ», «հրդեհ» կամ «հրդեհի հունձք» բառերը Չարդարյանի համար ինքնանպատակ չեն և դրսևորվում են իբրև գաղափարանիշ արտահայտչամիջոցներ: Կրակը կամ հրդեհը Չարդարյանը դիտում է ոչ միայն ազատագրական պայքարի խորհրդանիշ, այլև հին կյանքը մերժող ու նորը մարմնավորող պաշտամունքային երևույթ: «Ուխտած ենք կրակով հատուցանել այն պարտքը, որ թշնամին համայնատարած հրդեհով ու մոխիրով փոխ տվավ մեզի: ...Ու մենք տեղահար ձեռքերով կվառենք խարույկը, մինչև որ անոր բոսորագույն լույսը ճառագայթե բոլոր մութ հոգիներեն ներս, մինչև որ ազատության վերջին զոհին մարմինը ձենձերի փրկության տաճարին առջև: ...Դարերու նախատիմքն ու ամոթն է, որ կիրդեհենք» («Բագինին փառաբանությունը», էջ 338): Չարդարյանի այս երկի հերոսը առավել քան համոզված է, որ խարույկի բոցերը կջերմացնեն բոլոր արհմերի ու անարհմերի հոգիները և հաստատական կդարձնեն նրանց. «Բարձրագույն ու անհողդող՝ կանգնած ենք մահվան դեմ՝ մեր ահավոր ցավին հետ, որ մեր փառքն է միանգամայն, և հպարտությունն ունինք պատմությանն ավանդելու դյուցազնությանց ամենեն սխրալին, հպարտությունն ունինք հետագա դեռ տառապող մարդկության փոխանցելու ազատության ամենեն հզոր սարսուռները» (էջ 339):

«Ով որ Սուլթան մը ունի իր հոգին մեջ» լեզանդում Չարդարյանը հասնում է փիլիսոփայական եզրահանգման. հերոսը՝ Իրանի Վուալե Սինա բանաստեղծը, երկրներկիր դեզերելով, գտել է մարդկության թշվառության ու խեղճության պատճառը. «Չարհուրանքով տեսա, թե սրտերը իշխաններ, և հոգիները արքաներ չունեին» (էջ 238): Բանաստեղծի կարծիքով՝ գահագուրկ են այն մարդկային հոգիները, որոնք տկար են, վեհերոտ, ըմբոստանալու ու պայքարելու անընդունակ: Այդպիսի հոգիները դատապարտված են հավիտենական հալածանքի, հպատակության: Վուալե Սինա բանաստեղծը մարդկային կյանքի ամենամեծ դժբախտությունը համարում է ստրկամտությունը և մահկանացուներին է կտակում իր վերջին խորհուրդը. «Մինչև որ ամեն մարդ ամեն ժողովուրդի մեջ՝ իր սրտին վերանորոգված ապարանքին դռներուն առջև, օրվան բոլոր ժամերուն նոր թագավորի մը դուրս ելլալուն չսպասե, երկրպագելու համար անոր նորոգ փառքին ու նորոգ շքեղությանը, բոլոր հոգիները պիտի մնան հավիտենապես գթության արժանի, և բոլոր ազգերը հավիտենապես դժբախտ, որքան էլ երկիրները իշխաններ ունենան, և պետությունները՝ ինքնակալ» (էջ 239): Որքան վեհանձն, խիզախ լինեն անհատները, այնքան հզոր

կլիմի ազգը: Չի կարող լինել զորեղ ու բարձր գաղափարներով օժտված ազգ, ժողովուրդ՝ առանց դրանք կրող անհատների. սա է այս հրաշագեղ երկի փիլիսոփայությունը:

Չարդարյանը բավականին հստակ նկատել է մեր ազգի ազատասիրական ձգտումները խոչընդոտող ևս մեկ հույժ կարևոր երևույթ. դա հային ներհատուկ դյուրահավատությունն է և օտարների հետ հույսեր կապելը: Լավատեղյակ լինելով մեր պատմությանն ու նրա բախտորոշ անցքերին՝ Չարդարյանի պես մտավորականը վաղուց էր միջ համարում եվրոպական խոշոր տերությունների միջոցով հայկական հարցի լուծումը: Հասկանալի պատճառներով գրողը այդ միջի պասկազերծումը իրականացնում էր բնապատկերների, կենդանիների և բնության ծայների շնչավորում-անձնավորմամբ: «Գամփռ», «Մենավոր ծառը», «Լեռան եղնիկին» արձակ բանաստեղծությունները սիմվոլիստական գործեր են: Թե՛ գամփռը, թե՛ ծառը, թե՛ եղնիկը կերպավորում են ազատատենչ Հայաստանը, հայ ազգին: Երեքն էլ վեր են կանգնած այն գորշ իրականությունից, ուր ճնշվում են միտքն ու հոգին, ուր թագավորում է վեհերոտությունը, նենգությունը, թուլակամությունը, փոքրոգությունը: Գամփռ աննկուն հայն է, ով երբեք չի ընկրկել դժվարությունների առաջ, ըմբոստ ու արհամարհական կեցվածքը հառած քաղքենի վայրահաչ ու ցեխոտ շներին՝ բռնում է տունդարձի ծամփան՝ ապրելու ու մեռնելու արժանավայել. «...լավ է անոթի մեռնիլ՝ քան թե երկու թաթերը երկնցնել՝ կուրծքը ցեխին քսել քաղաքի ծակաչք մարդեն կտոր մը հաց խնդրելու. լավ է կատաղի անհավասար կռվի մը մեջ երիտասարդ գայլի մը հետ ձակատ ձակատի գալ ու մեռնիլ վիրալից՝ քան թե փողոցի մը մեկ անկյունը ոգեվարիլ ու իբր նվաստ, արհամարհված կենդանի ավարտել քեզի տրված կյանքի բաժինը» (էջ 245): «Գամփռ» երկի շուրջ ձևավորված հիացական կարծիքները մի կողմ թողնելով՝ ուզում ենք մեջքերել խիստ բացասական, ավելի ստույգ՝ ջախջախիչ մի մեկնություն, որը մեծ աղմուկ է հանել ժամանակին և նորովի դիտարկման կարիք ունի: Խոսքը վերաբերում է Շահան Շահնուրի «Ավուր հացի կարոտ» հրապարակմանը: Նա նախ պասկազերծում է հայ գրականությունը՝ գտնելով, թե այն զուրկ է մտքից ու տրամաբանությունից: Որպես իր արտահայտածի ապացույց Շահնուրը վկայակոչում է Չարդարյանի «Գամփռ»: Քննադատության թիրախ դարձնելով գրողի «Ցայգալույս» ժողովածուն ընդհանրապես՝ Շահնուրը Չարդարյանի այսպես կոչված՝ «միջակությունը» ի ցույց դնելու համար մատնանշում է «Գամփռի»՝ իր կարծիքով խոցելի կետերը: Քննադատի ժխտողական վերաբերմունքը ծնվել էր շան խորհրդապատկերման զարդարյանական ձևից: Ըստ Շահնուրի մեկնակետի՝ գամփռի կերպարում մարմնավորված է դաշնակցական անհատը, որին հալածում են ստրկամիտ, գաղափարազուրկ քթթթները: Շահնուրը Չարդարյանին մեղադրում է մի շարք հարցերում: Նրա

կարծիքով՝ արձակագիրը սկզբից մինչև վերջ գամփռին վերագրում է մարդկային հատկանիշներ, ինչը արվեստում անթույլատրելի է: Դատապարտելի է համարում թեման բացեիբաց չներկայացնելը: Իսկ ամենանշավակելին, Շահնուրի դիտարկմամբ, Ձարդարյանի երկում մտքի և տրամաբանության աղձատվածությունն է, տկարությունը, անհստակությունը. «Ան իր գամփռին կը պատվիրե կրկին լեռ բարձրանալ «և անհավասար կռիվի մը մեջ երիտասարդ գայլի մը հետ ձակատ ձակատի գալ և մեռնիլ վիրալից»: Ուրեմն ըստ Ձարդարյանի Դաշնակը ոչինչ ունի «անելիք» ի նպաստ կյանքին: Անկարող է կյանքը գեղեցկացնելու, բարելավելու, փրկելու: Ան պետք է որ «անհավասար կռիվ» փնտռե: Փոխանակ հաղթանակի, պետք է վիրալից և գեղեցկատիպ մահը որոնե: Մեռի՛ր կ'ըսե իր հզո՛ր մտավորականին, ամսահման անգիտակցությամբ»: Ձերժ մնալով կողմնակալ վերաբերմունքից՝ փորձենք որոշ տեսակետներ հայտնել՝ շահնուրյան մեկնաբանությունների հետ կապված: Նախևառաջ արձանագրենք, որ Շահնուրի վերլուծության եզրակետը՝ գամփռին իբրև գյուղից քաղաք եկած դաշնակցականի ներկայացնելը, անընդունելի է: Եթե Ձարդարյանը դաշնակցական գործիչ էր, սա անպայմանորեն չի ենթադրում, որ պետք է հերոսը այդ կուսակցության ներկայացուցիչ լինի: Մյուս կողմից՝ Ձարդարյանը երբեք, ոչ մի առիթով, ոչ մի ստեղծագործության մեջ դաշնակցականի չի կերպավորել, քանի որ նրա գիտակցական մակարդակը թույլ չէր տա գեղարվեստը մղել կուսակցականացման, հետո՝ ազատագրության գաղափարը դաշնակցականների մեծաշնորհը չէ: Եթե խնդրին մոտենանք շահնուրյան դիտանկյունից, թե գամփռը ազատախոհ դաշնակցական մտավորականն է, այդ դեպքում մի շարք հարցեր են առաջանում՝ ովքե՛ր են քրթոթները, ո՞վ է այդ մեծ շան զավակը, գայլի կերպարով հանդես եկող թշնամու դեմ արդյո՞ք միայն դաշնակցականն է պայքարում: Այս հարցերի պատասխանները դժվար է ակնկալել: Ինչ վերաբերում է Շահնուրի նշած գաղափարապաշտ անհատի, գերմարդու ստեղծման զարդարյանական անհաջող ձիգերին, նկատենք, թե այդ կարծիքը միանշանակ մերժելի չէ, ինչի համար հիմք է տալիս «Ով որ Սուլթան մը ունի իր հոգիին մեջ» երկը:

Մենավոր ծառը նույնպես խորհրդանիշ կերպար է՝ միայնակ մնացած Հայաստանը, որ դարերով կռիվ տալով՝ մնացել է աննվաճ ու աննահանջ. «Իր քույրերը, վայրի խոտ, վայրի ծաղիկ, վայրի անանուխ, ամենն ալ իրեն պես. հանդիպող ունի հասարակ ոտք չի կոխեր զիրենք, ոչ ալ պատահական ամեն անցորդ կհաճոյանա իրենց գեղեցկութենեն ու ձեռք կնետն անոր. մյուսները, պարտեզներուն, հասարակաց դաշտերուն վրա ծաղկողները դյուրամատչելի, դյուրագին ցնծուհիներ են, հաճոյակատար, անձնամատույց՝ որոնց բույրը

1 «Ապագա», Փարիզ, 1936, 18-19 ապրիլ:

բորոտ ռնգունք մը անգամ կրնա կողոպտել և գառնուկի շրթունք մը անոնց փափկությունը բռնաբարել» (էջ 298): Չարդարյանը վստահ է, որ խրոխտ ու անսասան այդ մեծավոր ծառը, առանձնացված անպետք ցախերից, փափկակյաց թփերից, երբեք չի երկնչել հզորաշունչ ամպրոպից, հրդեհածին կայծակից, կործանարար քամիներից, մոտ է լուսաշող ապագային:

Ազատ կյանքի, անկախության, գեղեցկի և այլ բարձրագույն իդեալների խտացում է «Լեռան եղնիկին» արձակ քերթվածը: Եղնիկը՝ բնության ամենաքնքուշ ու վախվորած, բայց միշտ հաղթական թռչքներով, ազատ կյանքի սովոր այդ էակը, ուզում է միայն խաղաղ ու երջանիկ օրեր ապրել՝ ոչ ոքի վնաս ու ցավ չպատժառելով: Բայց անմեղ կենդանուն շարունակ հալածում են որսորդները, ովքեր սպանում են թե՛ գեղեցիկը, թե՛ ազատությունը: Ինչ էլ որ լինի եղնիկը նախընտրում է անկոխ բարձունքները կամ արժանապատիվ մահը: «Բնությունը չի կրնար քնացնել քու զգացմունքներդ, չի փոխարիներ զանոնք, որովհետև սորված չես հեզաբարո ու գոհունակ ոչխարին, մութ ու թաց ախոռի եզան, գոմեշին նման պղտոր առուններե, տղմուտ ձախիճներեն ծարավդ անցնել հարկ եղած ատեն, որովհետև քու անհանդարտ տրամադրություններդ, քու ազնվական վեսությունդ ոչ մեկ գնով ալ չեն կապվիր մարդկային եսական քմահաճույքներուն, անձնասեր պահանջներուն» (էջ 304): Չարդարյանը ստեղծագործական հետաքրքիր հնար է կիրառում՝ դիմելով Հայաստանի խորհրդապատկեր եղնիկին: Նա, եղնիկի ազատաբաղձական նկրտումներն արտահայտելուց բացի, կենդանուն հորդորում է չգայթակղվել օտար հրապույրներից ու հմայքներից. «...Ո՛չ, վար միջքեր քու որջեղ՝ ինչքան ալ գեղեցիկ հազվին կապվին դաշտերն ու ծործորները, պարտեզներն ու արոտավայրերը ապրիլի այս գմայլելի առավոտներուն, որքան ալ ծյունապատ ըլլա դեռ քու ծննդավայրդ: Թող այս գեղածիծաղ ու պչրալից երևույթներուն պատրանքը չփորձես քու միամտությունդ, դուն կեցի՛ր ամպերուն մոտ, երկնքին ջինջ կապույտին մոտ, դաշտերեն վեր, տափարակ տարածություններեն վեր, միշտ անընտել, միշտ խրտչան ու անհնազանդ...» (էջ 305):

Բոլոր երեք արձակ բանաստեղծություններում էլ Չարդարյանը դրոշի պես ծածանում է իր՝ մտավորական գրողի, քաղաքական գործչի անխախտ գաղափարական գիծը՝ համախմբված ընթանալ ազատության ուղիով՝ ապավինելով միմիայն սեփական ներուժին: Ուշագրավ է մի իրողություն ևս. երևակայական թշնամին՝ որսորդը՝ եղնիկի վրա զենք գործածողը, դատապարտված է կորստյան: Նույն այս ենթիմաստը ուրվագծվում է Չարդարյանի «Չարնված որսորդը» հեքիաթում՝ մի տարբերությամբ միայն, այնտեղ խորհրդանիշ հերոսը այծյամն է, և որսորդը վախճանվում է. «Վա՛յ անոր, որ այծյամին նշան կբռնես» (էջ 174):

Իհարկե, Չարդարյանը չէր սահմանափակվում սոսկ ազգային գաղափարների քողարկված կամ բացահայտ վերհանմամբ և դրանց արտացոլմամբ. նրա հայեցակետի համաձայն՝ ազգերի ու երկրների խաղաղ գոյակցության և բարգավաճման համար անհրաժեշտ է վեհաճշմունքություն և խղճմտանք: Այդ նպատակին գրողը ծառայեցրել է երկու ստեղծագործություն՝ «Բռնավորին արցունքը» և «Տեմիր-Ղայա»: Չարդարյանը թափանցել է պատերազմների և ամեն տեսակ կռիվների խորքը: Ինչպես վկայում են վերը հիշատակված երկերը, սպանությունների, մարտերի, նախժիրների ծնունդն են մարդկային խղճի չգոյության, պակասի:

Տեմիր-Ղայան՝ համաճում երկի հերոսը, մի ավազակապետ է, ով իր խմբով կողոպտում, թալանում է մարդկանց: Սակայն դիպվածը նրան մղում է մաքրագործման. մահաներձ ավազակապետը Աստծո կամքով բարեգործությանը հատուցում է մեղքերի դիմաց: Քսանամյա մարդասիրական առաքելությունը չի մեղմում Բարձրյալի գայրոյթը: Տեմիր-Ղայան մաքրվում է միայն այն ժամանակ, երբ մի դավաճամի գրկում է կյանքից: Այս լեզբնդի խորհուրդն այն է, որ Չարդարյանը առաջ է քաշում համամարդկային գաղափար՝ ենթատեքստում ունենալով ազգայինը: Յուրաքանչյուրը պետք է ապրի այն վեհ գիտակցմամբ, որ անմեղներից կյանք խլելը ծանրագույն հանցագործություն է, իսկ եթե հեղվում է արյունը մարդասպան-ազգադավի, ապա արդարացվում է: Այսինքն՝ Չարդարյանը ներքուստ իր ազգին կոչ է անում զենք վերցնել ու ոչնչացնել կեղեքիչներին, զավթիչներին ու դավադիրներին:

Անիրակամի ու իրակամի յուրատեսակ հակակշռով լեցուն գործ է «Բռնավորին արցունքը» լեզբնդը: Մի կողմում Նաբուգոդոնոսոր բռնակալ արքան է, ով փորձում է ամեն գնով դադարեցնել անմեղ զոհ Չաքարիա քահանայի արյունը, մյուս կողմում՝ իրական աշխարհն է Մույնքան իրական ու անխիղճ բռնակալներով: Չարդարյանն իր բռնավոր հերոսին մղում է զոջման, ով բազմաթիվ մարդկանց սպանելով է փորձում լռեցնել մշտահոս արյունը. «Վա՛յ ինձի, վա՛յ ինձի, եթե այսքան մարդ տանջանքի պետք է ենթարկվի մեկ մարդու մը արյունին համար, ի՞նչ պիտի ըլլա հապա իմ վիճակս՝ որ տասը հազար մարդկային արարածներու արյունը թափեցի» (էջ 218),- բացականշում է Նաբուգոդոնոսորը «զգաստության ու խղճահարության հազվադեպ վայրկյանի մը մեջ» և իր արցունքներով է կանգնեցնում արյան հոսքը: Եթե հիշյալ արքան և մյուս բռնակալները ունենային ապաշխարիության և խղճմտանքի վայրկյաններ, այսինքն՝ եթե նրանց մեջ մի քանի ակնթաթ գազանի փոխարեն լիներ մարդը, ապա արյան լճակներ չէին գոյանա: «Բայց այդ արցունքը չէ՛ կաթած երբեք պատմության մեջ և չի՛ կաթեր երբեք» (էջ 219),- վատատեսական վերջաբանով ավարտում է Չարդարյանը: Գրողը երևութական աշխարհից նրբորեն անցնում է իրականության, որը պարտադրում է իր օրենքները, քանի որ

մարդը դեռ հեռու է մարդ կոչվելուց, շարժվում է վայրենու բնազդներով. «Ահա թե ինչու համար վշտակիր մարդկության տառապանքն ու արյունը՝ իբրև նախատինք ու վրեժխնդրություն պիտի շարունակեն պղպջալ ու վրեժ ժայթքել միշտ բռնավորներու պալատներուն սեմին վրա և բազմատեսակ բռնությանց ընդդեմ, մինչև որ ընկերական արդարության ու ազատության մեծ գաղափարը գա վերջ դնելու մարդկային ստրկության և շահագործության, խնայելով բռնավորներուն պղնձն աչքերը՝ կարեկցության արցունքները, և թշվառ մարդկությունը իր ծով արյունեն» (էջ 219):

Չարդարյանի ամենամեծ երազանքը մարդկանց հավերժական երթին ականատես լինելն է, նրանց մշտազվարթ ու երջանիկ տեսնելը: